

四庫全書

集部

欽定四庫全書

集部

宛陵集卷二十一
三至

詳校官庶吉士

臣張溥

檢討臣何思鈞覆勘

覆校官博士

臣劉光第

校對官主簿

臣汪日贊

謄錄監生

臣林李

欽定四庫全書

宛陵集卷二十一

宋 梅堯臣 撰

次韻景彝春宴

法座初瞻戶牖間，袞衣垂處見雲山。
滿斟玉酒傳宣盡，齊插宮花拜賜閑。
紅線織成庭下毯，明珠結出耳中環。
鬬雞旗底逢逢鼓，逐勝爭名利害關。

次韻景彝三月十六日范景仁家同飲還省宿

種桃依竹似仙家，邀對春風共泛霞。
席上未觀雙舞鳳，

城頭已覺聚啼鴉，
恩恩跨馬人歸省。
幕幕生煙樹飲花，
穉子候門知我醉。
東方明月照扉斜。

次韻永叔試諸葛高筆戲書

公負天下才，用心如用筆。
端勁隨意行，曾無一畫失。
因看落紙字，大小得疎密。
筆工諸葛高，海內稱第一。
頻年值我來，我媿不堪七。
安能事墨研，欲效前人述。
嬾性真嵇康，閑坐喜捫蝨。
是以持獻公，不使物受屈。
果然公愛之，奇蹤寫名實。
豈惟播今時，當亦傳異日。
嗟哉試筆詩。

藏不容人乞

唐書局後叢莽中得芸香一本

有芸如苜蓿生在蓬藿中草盛芸不長馥烈隨微風我
來偶見之乃穉彼翳蒙上當百雉城南接文昌宮偕問
此何地刪脩多鉅公天喜書將成不欲有蠹蟲是產茲
弱本穉爾發荒叢黃花三四穗結實植無窮豈料鳳閣
人偏憐葵葉紅

嘲景彝獨
愛葵花美

嘲江翁還接羅

江簡云嘗憶張籍詩有恐傍
人偷剪樣尋常嬾戴出書堂

何言恐偷樣自是君婦嬾五日縫一巾猶道苦未晚

次韻景彛閣後紫薇花盛開

禁中五月紫薇樹閣後近聞都著花
薄薄嫩膚搔鳥爪
離離碎葉翦晨霞
鳳皇浴去池波響
鵲鵲陰來日影斜
六十無名空執筆
顛毛應笑映簪華

送李太伯歸建昌

推天以知命自古豈不然
桓魋及臧倉嘗毀聖與賢
後人何蹈之其事實好還
君居麻源谷學禮如鄭玄
聲名

久已大籍籍四海傳昨因丞相舉便謂升雲煙竭來太
學館食貧向三年忽懷粉榆下歸思獨絲絲得告許暫
往落莫求楚船捋髯滄江上仰看飢飛鳶誰識鷓鴣志
閑誦莊叟篇喜問里中兒重到舊林泉洗蕩俗塵垢焚
裂跨馬韉不向世路去徒取愁腸煎雞豚粗可養禾黍
亦足田不慙莎衣蟲以葉自包纏及其飽滿時曷異冠
貂蟬君意我彊寫雖慕何由緣

送林大年殿丞登第倅和州

和靖先生負美才族孫今似漢庭枚敗亡項籍江邊廟
應媿文場戰勝來

王知章尉河內

古縣太行下老槐三四株以言新作吏不似舊爲儒黃
綬心猶壯青雲志豈無漢朝吾遠祖不道此官廳

送祖擇之赴陝府

古來分陝重猶有召公棠此樹且能久後人宜不忘君
從金馬去郡在鐵牛旁山色臨關險河聲出地長樽無

空美酒魚必薦嘉魴天子憂民切行當務勸桑

中伏日永叔遺冰

日色若炎火正當三伏時盤冰賜近臣絡繹中使馳瑩
澈肖水玉凜氣侵人肌近日多故友分貺能者誰信都
顧貧賤物物義不遺念我老且病赤痢生枯皮巨塊置
我前凝結造化移畏冷不敢食有類夏蟲疑雖然已快
意何必咀嚼爲天子厚於公不使熾毒欺公亦厚於我
將恐煎熬隨我有舐犢愛自憐小子龜

次韻和永叔贈別擇之赴陝郊

古人相送贈以言今人相送舉以酒酒行殷勤意豈疎
酒罷躊躇悲更有行當何之來者誰陝府兵吏爭迎走
壺漿往往過面關翰林惜別方攜手自言老大遇知難
願得公詩爲不朽公因索筆作長謠落落寓言誠十九
我慙竹管廁宮懸縱合律度應非偶太守西行已不貧
忽獲明珠盈大斗歸立螭頭未是遲暫向棠陰問遺叟

送施綽秀才下第

君嘗老於敵輕彼羣兒嬉堅銳不可恃屢北還自疲胃
中多奇祕旣何所爲東走滄海上夏果采荔枝奉親
樂無涯豈媿祿仕遲

送張山甫武功簿

洛陽舊交有七人五人已爲泉下塵各家生兒爲門戶
唯子弟兄先立身我與信都侯獨在喜見及祿知天仁
昨日聞補武功吏氣調欲與南山親少年勉力向職事
莫學老貪文字新

送微上人歸省天台

釋子懷慈母吾儒未易輕不尋琪樹去肯向石橋行海
近雲多潤山高日少晴天恩新賜服書字欲傳名

寄天台梵才上人

常觀月從東方出想照石橋旁畔人試問當年與今日
清光不改只如新

送李信臣尉節縣先歸湖州

梁王吹臺側五月多荷花荷開對翹鷺吳客還思家家

在水中城四面如鋪霞焉能長相守千里獨起嗟補官
東海上物景莫言賒

送王巡檢之定海

休淬鷗鷺劍休調鵲血弓平時自壯大何所立戰功得
兵不滿百防寇滄海東駕船如飛鷗出入巨浪中苟能
勇於此遇敵無廢忠

同梅二十五飲永叔家觀所鈔集近事劉敞

陶令一畝宅尤愛北窗風心遠地誠僻客來樽不空觀

書太史氏金性市門翁予亦何爲者於此清賞同

來上人歸宣城兼簡太守孫學士

李白不厭敬亭山看盡飛鳥雲獨閑我今相送一懷想
想在謝公牕戶間

始作燕子巾

裏髻不裏額自名燕子巾翼覆尾涎涎誰問巢由人

謹賦

避暑就高臺不如就賢人賢人若冰雪論道通鬼神自

言信手書字字事有因往往得遺逸烜赫見名臣是日
劉夫子拍手氣益振重覩太史公吾徒幸來親大笑舉
玉杯陶然任天真內樂不復熱豈以身爲身

送侯孝傑殿丞僉判潞州

同在洛陽時交游盡豪傑倏忽三十年浮沉漸磨滅唯
餘一二人或位冠夔契我今存若亡似竹空有節人皆
欲吹置老硬不可截君自緱山來別我不畏熱言作潞
從事家貧祿仕切六月上太行辛勤非計拙天當氣候

涼清風自騷屑雖云數日勞斗與炎蒸絕君本公王孫
才行實脩潔鏘鏘發英聲瑩瑩如佩玟是爲君子器終
見不渝涅相逢未易期夢寐歸鼓枻

送張子野知虢州先歸湖州

來赴虢太守暫歸吳興家吳興近洞庭橘林正吹花君
當橘柚時摘包帶霜華清甘不楚齒若酒傾殘霞谿山
小女兒姹姹兩髮丫裊裊上顰顰嘈嘈弄琵琶是時與
之醉何似走塵沙

送尹瞻駕部監靈仙觀

天地如轉磨屑屑今古人一落大化手罔品惟其新不
幸積不用袞袞同埃塵日月行何窮過盡千萬春人生
占幾許百歲猶比晨君求潛山潛捨去兩朱輪願效陶
淵明翦紗爲破巾山前溪多鱗山下酒甚醇看雲舉大
杓杓造舒州民李白嘗愛之死生曾與均此志我亦有
更將援鳥親

送朱玠戶曹之廣德軍

南方小兒纔讀書往往得官訶路衢君今五十始作掾
手板青袍非壯圖況來桐汭水上城折腰彊顏休歎吁
城西古祠能致雨歲不有旱民無逋民樂未央君可娛
舊俗不與吾鄉殊

次韻和永叔原甫致齋集禧

廟嚮靈祠屬二公齊心相望切朱宮綠渠繚繞墻垣水
廣沼清泠漲殿風已詠應麟來五時仍歌翔鴈雖殊翁
遥知畢事期尋勝尚問衰羸未厭窮

送王司徒定海監酒稅

悠悠信風帆杳杳向滄島商通遠國多釀過東夷少懷
鄉寄書遲見日知晨早應聞有海花何必樹萱草

端明李侍郎挽歌三首

少年為侍從名譽竟軒騰每吐胸中鳳寧容筆上蠅受
釐延漢室被謗過周陵今日泉宮啓師臣禮秩增

官豈不為達其如望未克敏辭傾一代發問詘三公猷
向承明直思行邵伯風嗟嗟玉樹折埋沒彼蒿宮

秋樹無黃鳥，蟬聲亦自哀。
素車新隴去，白馬舊賓來。
薤上朝陽露，池中歲劫灰。
短長何足較，嗣子有高才。

次韻和永叔夜聞風聲有感

月落夜正黑，風起庭槐端。
窗間星動搖，枕上人寤歎。
所歎吹陰雲，苦熱彌不歡。
當其氣莫出，曷若無衣寒。
虛堂臥竹簟，汗體如露漙。
驅蚊熱蒿艾，寧復襲芝蘭。
煎灼一如此，衰枯誰可完。
消磨任寒暑，安有不死丹。
三伏已過二，炎赫應漸殘。
試看蜚蝗蟲，辛勤方轉丸。
焉得從釣舟。

逆上嚴子灘此事人所易謝榮爲獨難誰顧萬古名黑
石持鐫刊風聲不用撼牀頭閑素紈

次韻和永叔石枕與笛竹簟

溪上枕剖龍卵石斲匠簞製蛇皮紋客從東方一持贈
竹色蒸青石抱雲磨沙斲骨自含潤飽霜弔節無留塵
京師貴豪空有力六月耐此炎蒸劇旱風赤日吹熱來
大厦高檐任雕飾頭顱汗匝無富貧雖有頌冰論官職
官高職重冰則多日永冰消難更得唯公埽室施枕簞

迎涼自感東方客東方客應非俗昏能使賢人心體適
賢人何以偏伏人天下才名方赫赫我吟困窮不可聽
晝夜蚊蚋蒼蠅聲蠅如遠雞耳初感蚊若隱雷空際鳴
葛廚頂綻屋蝸墮菅席中裂麻經橫平生賦分只煎炒
安有祿玉琉璃清猶勝昔年杜子美老走耒陽牛餓死
因思楊惲廢時言但願人生行樂爾公今事業在朝廷
去就尤當慎終始待公睡足秋風來去奉高談揮麈尾
寄題朱表臣職方真州新園

青蔥江上樹杳藹宮前道道側有新園園中無惡草松
隴方在望茅屋聞已考朝廷正急才何得言歸老

次韻和原甫閣下午寢晚歸見示

殿閣風來夏日長青林抽嫩見餘芳筆供五吏詞休敏
簾展雙紋睡正涼故事早歸何獨晚舊交新詠尚無忘
不言偃仰中園樂還愛睂間喜色黃

三十二弟寺丞歸宣城因寄太守孫學士

謝公下車日郡內一登望昭亭山蒼蒼寒溪水漾漾句

清宛微渾三洲分細浪小艇下灘來羣鷗舞潭上借問
鷗何若水深魚莫向鷗餒猶識機魚樂不忘餉子去見
太守於我必有訪但寄此薄言樽前爲之唱

送刁景純學士赴越州

會稽迎太守舟屋畫粉牋前舟載圖書後舟載女樂月
出鏡湖心長笛使孤作還見漁者來曾令李謦愕吹裂
比竹管士果不可度二分學宮裝豔色關京洛嘗聞有
西子菑菑不相若得郡考故跡精絕古所作慎莫爲俗

牽乘閑數斟酌

送宋郎中知商州

孝孫

商於六百里太守二千石地廣任亦重車建旗仍赤賞
聞四老人采芝留舊跡古廟藏空山曾無漢羽翼其事
有圖畫家傳多典籍願君爲政閑案覽知疇昔

六月晦日定力院同原父賦送伯鎮景純樞言

三學士

清秋三黃鵠舉翼東來飛鳴聲旣相呼煙水亦相依蓬

池不暫止太液未言歸酌酒望滄海飄飄思菊衣

次韻和景彝省闈宿齋二首

晝日南宮雨後涼齋嚴官重靜於常庭前鬬雀墮還起
欄下秋花落自香看盡雲容天漏碧讀殘書帙卷披黃
九衢塵土莫能到蕭瑟微風葉響廊

新月斜光依約見夜蟬高樹有時鳴曲眉不想西家樣
餒腹還思二子清迭代物華何足較古今榮謝豈須驚
靜來應覺能閑少人事區區逐日生

送刁景純知會稽

前有朱翁子後經王右軍至今風俗美自昔誦歌聞秦
望臨丹戟邪溪漱白雲只應絲管去驚動海鷗羣

次韻荅王景彝聞余月下與內飲

仰頭看月見新鴻形影雙飛玉鑑中呼我作卿方舉酒
更煩佳句賞高風

次韻和景彝對月

蕭蕭風雨變涼意索索晚雲開斗晴已洗浮埃天外靜

忽生圓月樹頭明草根蟲穴吟來久屋角星河落更清
我媿西垣侍臣比影寒霜鬢兩三莖

和景彝新秋西閣獨直

池頭鳳皇寒井上梧桐老鳳寒浴已晚桐老脫亦早是
時有詞臣獨直正視藁嚴嚴代王言落落奮清藻演成
五色絲世作非常寶貶如市朝撻褻若華袞好四方號
今施萬耳昏聾埽此職唯其才用居寧草草

宛陵集卷二十一

欽定四庫全書

宛陵集卷二十二

宋 梅堯臣 撰

次韻景彝奉慈廟孟秋攝事二十韻

闕宮初告饗駕駱已迎秋
公衮惟時攝齋廬用爾休
椒漿茲往奠鸞馭或來游
任如徽音繼邦家故事脩
前期嚴受誓侵曉肅傳騶
雞狗藏深戶蚊蠅響暗溝
別祠緣相漢舊禮效宗周
蕭氣接庭燎鼓聲通市樓
樂章分廟奏牲物用毛柔
木主升新座牙盤列庶羞
叩階除劒履

宿羽動梧楸。錫胙人移俎。焚辭漏畫籌。豆籩將降陞。胥
史劇奔牛。事畢歸烏巷。陰餘晦綠油。驅車多叱咤。負擔
起歌謳。却直中書省。重瞻十二旒。詞供五更敏。詔示四
方優。密議存王體。斜封贊禹謀。勤誠酬異等。潤色闡嘉
猷。彊擬鄴中詠。我思康樂侯。

次韻和景彝秋興

日月機上梭。年華東注波。未驚涼葉墜。已見白髮多。牧
馬歸方健。調弓力漸和。籬邊賸晚菊。陶令奈貧何。

司徒陳公挽詞二首

位至三公有恩加賜謚無再調金鉉鼎屢剖玉麟符已
歎鸞同穴還嗟鳳少雛擁塗看鹵部誰爲畢三虞
公在中書日朝廷百事崇王官多不喜天子以爲忠富
貴人間少恩榮歿更隆若非笳鼓咽寂寞奈秋風

秋思

梧桐在井上蟋蟀在牀下物情有與無節候不相假寥
寥風動葉颯颯雨墮瓦耳聽心自靜誰是忘懷者

送葉都官赴蜀中倅

仲舒

每有人之蜀先憑問海棠徒知花底醉不報樹頭芳上
馬秋風急登山古路長西南生片月遙想見清光

次韻答吳長文內翰遺石器八十八件

山工日斲器殊匪事樵牧掘地取雲根剖堅如剖玉食
具與果具待賓良有勗亦將茶具并飽啜時出俗公何
都贈予金多不入目我家固宜之瓦盃居漏屋得此尤
稱竊客來無不足唯應赤腳婢收拾怨常酷夏席堆青

齋冬盤飮旨蓄竟無梁肉饌甚媿蕭家錄

送張君儀太祝僉判奉寧軍

社雨燕巢空古陂
殘葉老燕去春當還
殘枯秋不早
莫以西風高於馬
亂懷抱指塗無幾里
駛馬一秣草
彼美賢主公
文章爲世寶
笑談樽俎間
勿負風月好

寄題陽武宰王安之慶豐亭

官爲人父母
身自奉其親
結宇後園中
散步以怡神
寒溫適所適
朝夕饋爾珍
諸孫同在傍
嬉戲情各均
庭下

香草秀梁上乳鳥馴乳鳥名曰烏反哺豈不仁香草名
曰蘭相襲使之紉二物已可知百里風俗淳

北州人有致達頭魚于永叔者素未聞其名蓋
海魚也分以爲遺聊知異物耳因感而成詠

孰云北海魚乃與東溟異適聞達頭乾偶得書尾寄枯
鱗冒輕雪登俎爲厚味向來昧知名漁官疑竊位有如
臧文仲不與柳下惠從茲入杯盤應莫慙鮑肆

送柳祕丞大名知錄

瑾

言今魏都去聽我願少休地息戎馬牧民苦黃河流渾
渾發西極奮奮入九州自古患決溢于今爲瘡疣禹力
順而東漢防築其隄完壞非一日利害經千秋主印無
切責治水莫輕謀府公山西種貴已爲通侯樽酒與歌
舞上客共優游

送何都官通判虔州

若谷

楚越封圻接帆檣上下頻商通洲橘熟信到嶺梅春白
紆歌脩頸金盤饋紫鱗同勤太守職龔遂漢名臣

秋雷

春雷不發蟄秋雷不收聲向無一日雨今無一日晴昨
夕玉女笑閃閃揚目晴雷公與雨師自取號令明舒慘
由上天誕妄推五行日月不粒食安問下土耕雖然屋
瓦爛還有地菌生損彼以益此誰能較人情堯時不無
水用禹水乃平黎民思堯仁往往見於羹猶吾大君意
星火立水衡水衡雖努力豈將雷雨爭

送俞尚寺丞知蘄春縣

應見言風物于今有貢蛇潛蹤遠鼃鼃飲露上蒹葭清
潔一如此傷殘都莫涯君惟脩職業男未女綵車

和劉原甫白鸚鵡

出注輦國注輦在西海去中
州四十一萬舟行過西王母

三年乃達
番禺也

能言異國鳥來與舶帆飄嘗過西王母曾殊北海鯨雪
衣應不妒隴客宰相饒因憶禰處士舊洲蘭蕙凋

送劉定賢良下第赴廣陵令

劉賁不登科衆口誦其策得者爲之羞聞者爲之惜摧

藏一時屈論議千古白至今簡篇中一字不敢易其言
究時病春刺若戈戟引經見大法非蹈春秋僻我朝屢
得人無不陞顯赫乃知所中否實命繫通厄中則首公
相人情作冠幘否則走仕塗人情作履舄秋風廣陵城
千里夷門客壯心雖暫失美實有時獲悵悵以送君致
龍翻點額

九日永叔長文原甫景仁鄰幾持國過飲

秋堂雨更靜佳菊粲粲芳置酒延羣公掇英浮新黃心

猶慕淵明歸來醉柴桑莫問車馬之去迹亂康莊

送鮑都官錢塘通判

文鯨游西海夕飛向吳洲朱鼈生明月淵潛未可求由
來有變化何能計沉浮君子蹈出處誰將等隅陬臨水
賦二者相送無離憂

送通州通判刁國博

古郡見郎山海雲遮一半陽烏出滄波光彩臨硯案小
吏抱牘來磨墨為點竄豈以島嶼人百事皆漫漫朝廷

通守任不使守專斷是恐繆其才民勞乃生亂辛勤雖然多魚蠹莫知算夜月上蓬瀛偷閑舉杯看因行計較足少別休興歎

吳資政挽詞二首

天下文章老爲公地底銘平生懷道德鋪寫若丹青蒲市一朝罷浴人皆淚零嗟嗟廟堂貴今以柏爲庭
栽栽陞土厚自古葬賢人百尺不逢水千年空閉春夜
臺埋琬琰隴道刻麒麟西望緣纓淚曾無幕府賓

九月二十四日大風

秋飈無蹤迹空中聲奔馳
枯桑因已驗老病仍先知
驚沙入破隙危葉墮綠枝
幽懷聒不寐山岳將恐移

二十五日雪

秋露未爲霜秋空已飛雪
著樹增葉危墜叢憂菊折
平明開戶看斗覺顏檐潔
天時莫倉猝誰預衣裳設

送唐待制子方北使

王命來天外閼氏坐帳中
儀雖聘鄰國禮豈異和戎
漢

使方持節邊人自帶弓唯應沙漠凜不減諫臣風

送劉元忠學士歸陳州省親

芸香閑祕秩蘇合著新裘公子言歸日天王賜問優治
分周太宰禮重漢諸侯拜慶無如樂黃金作酒舟

送陳賢良忠正軍僉判

書對三千字恩科第一人鯢魚飛北海龍劍躍平津直
悟聰文主深論險尅臣已能明世弊枉作幕中賓

送韓持正寺丞知餘姚

君家二仲父連爲吳越宰錢塘與蕭山治跡應無改魚
鰕莫厭腥網罟從人采天晴姚江深縣鼓朝翻海

送周介之學士通判定州

相公秉文武視卒如嬰兒今徃佐其軍豈不重撫綏我
有愚者慮贈君臨路岐相公居并州拓土曾不疑羌戎
起潛變一旦覆我師我師無不勇將吏實易之常抱雪
恥志此旨君所知兵家尤戒貪持重養以威正當土門
路自昔屯虎貔朔朝及旬望大校飫酒卮未若投簞醪

共飲河水湄古人維其均今人意參差臨事欲之死身
往心已移上能同甘苦下必同安危願君因議論茲語
何難爲

送番禺杜杆主簿

行識桃根樹初窺翡翠巢地蒸蠻雨接山潤海雲交訟
少通華語蟲多入膳庖不須思朔雪梅吐臘前梢

還柳瑾祕丞詩編

吾友蘇子美聞昔許君詩子美今下世令人重嗟咨當

其不得志泥水蟠蛟螭未激西海流安可氣吐霓吳洲
逢朱鼈腹有百碧遺他時使我觀我觀顏怛怩便欲焚
筆硯奈何難爭馳

送張殿丞吉甫知資陽

單騎欲之蜀綠衣初過秦王喬鳧是舄陶令酒名巾灞
上愁逢雪襃中喜見春兩川風物美不似走京塵

丁端公北使

出聘天王使來乘御史驄馳車看燕雪貂扇禦嚴風俗

向殊方問言從信使通蜀庭觀拜舞不似未央中

張斯立遂州司理

自身買馬簾爲婦置幕離將出咸陽門同涉蜀道危疇
昔未祿仕日夕講書詩不能青雲高乃作黃綬卑前人
未遇時往往甘棲遲如築九層臺始起一板基雖然用
功深歲久終莫墮我今惜君行無力可致之去勿藉芳
草世俗多夸毗

寄題哀賢亭

馬仲開龍圖墳
前所叙立也

蒼蒼墓門樹亦有黃鳥哀賢者不在世常恨埋蒿萊山
根入溪泉流響出夜臺東方見子胥助濤高崔嵬

荅建州沈屯田寄新茶

春芽研白膏夜火焙紫餅價與黃金齊包開青窮整碾
爲玉色塵遠及蘆底井一啜同醉翁思君聊引領

送曹測崇班駐泊相州

知君鄴城去歷覽古時蹟我我銅雀臺其下遺瓦礫不
化鴛鴦飛多近蟾蜍滴哀哉魏武帝雄智圖九錫俄聞

望西陵作妓向朝夕曾何百年間事往如霹靂空餘幾
仞土陰峭古蘚碧下有牧羊人上有牂與羝寒風吹枯
草草短聲刺刺珠翠爲埃塵冠劍埋百尺顏回飲一瓢
仲尼不暖席擁徒食人肝生莫如盜跖令名今猶存焉
在刻金石我輩當太平白首無戰敵又知爲善樂尚媿
苟仕籍行行勤撫兵豎威酬德澤

十一月二十三日歐陽永叔劉原甫范景仁何
聖徒見訪之什

夷門魏公子來過抱關人車馬立市中貴義不恥貧市
人無不驚此老面鰲皺豈將流俗眼能辨玉與珉爾後
幾千載此賢埋埃塵誰謂四君子蹈古猶比辰上馬後
苑門訪我東城闥爲公開蓬戶沽酒焚紫鱗銀杯青石
盤共飲不計巡薄暮各已醉歡笑頽冠巾來旣無猜嫌
去亦無疎親曷若世上士惟顧勢力均

次韻和原甫陪永叔景仁聖徒飲余家題庭中
枯菊之什

九日車馬過我庭黃菊鮮重來踰七旬枯萼無復妍自
非凌霜操枝葉徒相連衰敗未忍去根荄尚翹然不意
憔悴叢猶爲君子憐固值時節晚豈恨地勢偏直如木
上蘿緣蔓欲到天一朝風雪厲零落向暮年至此事乃
等高低復何言公休誇松柏彭祖與顏淵各不相健美
焉能論柔堅願公時飲酒周孔今下泉

次韻和永叔飲予家詠枯菊

今年重陽公欲來旋種中庭已開菊黃金碎翦千萬層

小樹婆娑嘉趣足
鬢頭插蕊惜光輝
酒面浮英愛芬馥
旋種旋摘趁時候
相笑相尋不拘束
各看華髮已垂顛
豈更少年苔色綠
自茲七十有三日
公又聯鑣入余屋
階傍猶見舊枯叢
根底青芽數催促
但能置酒與公酌
獨欠琵琶彈啄木
所歡坐客盡豪英
槐上凍鷗偷側目
盤中有肉鷗伺之
烏鳥不知啼背曲
諸公醉思索筆吟
吾兒暗寫千毫禿
明日持詩小吏忙
未解宿醒聊和屬

送李獻甫寺丞知虹縣先歸金陵

今日歸爲美塗金作馬纓願言膏沐婦相望石頭城得
邑柳隄合還家梅野晴里中多樂事州牧是名卿

衛尉邵少卿挽詞二首

位至九卿亞年過七十春桐鄉歸葬日棠樹去思人霧
裏開蒿隧原邊起石麟地遙徒有淚灑向北風頻
買得吳門宅歸來自種花春風未歇徹東岱已魂賒昔
作千年調今爲一日嗟人將錫美德磨石取江沙

次韻和永叔對雪十韻

玉月梨梅柳
絮字皆不用

紛紛何亂目凜凜自開門著莫風難定侵凌物已繇裝
成新樹色遮盡古苔痕冷入梁王苑清乘衛國軒欺貧
凍蓬葦增險想轆轤小隙皆能及洪爐逼不溫雲衣隨
處積水甲等閑屯團戲爲丸轉堆雕作獸蹲豈愁穿破
履幸喜有清樽誰問諸公子高樓與後園

寄題劉仲叟澤州園亭

城臨太行谷谷暖宜草木旣移洛陽花又種阮家竹五
色雜黃紅一林常翠綠其間廣庭開亦欲危柳築春歸

百禽號搏黍及布穀桑上啄堪食林下窺果熟果收堪
已盡飛去不須逐婆娑黃楊樹誰謂逢閨縮物猶有進
退此理何用告余心當效君未有地可卜綴書豈貪樂
且以苟微祿

送李灝秀才南歸

乘驢雪中來別我千里歸江南梅花發身與越鳥飛幾
年客大梁著盡篋中衣空餘一束書去恨知者稀

宛陵集卷二十二

欽定四庫全書

宛陵集卷二十三

宋 梅堯臣 撰

送刁經臣歸潤州兼寄曇師

古來山林士一往不復返區區世上名豈畢車自挽前
有高山危後有落日晚未知所止息已慕田家飯愛君
京口歸萬事不著眼乘馬飾鞍轡乘舟畫屋版長塗與
白浪健駛固莫限力殫風定時各各繫岸棧寄語老空
人青崖勿鉏剗

贈狄梁公十二代孫國賓

雄雉飛上天
牝雞白日鳴
驅逐鳳皇雛
百鳥不出聲
豈無鵬與鷃
至死莫得爭
孤鶴獨不懼
使風羽翼成
鶴性本君子
嘹唳通太清
至今有其孫
踉蹌田中行
明時與稻梁
重節亦貴名
爾無沖天力
且與鶩鷁并
慎勿咏泥穢
坐使白鷺輕

寄金山曇穎師呈永叔內翰

江中我我山
上有道人住
風濤響殿閣
雲霧生席屨
道

人如不聞道人如不顧誰能識此心來往只鷗鷺京洛
三十年塵埃一相遇我與信都公已落衣冠故平生守
仁義齒髮忽衰暮世事不我拘自有浩然趣未由逢故
人坐石語平素

寄題刁經臣潤州園亭

新作城邊圃陂原上下斜竹多劉裕宅松接戴顓家山
色不須買江流何處涯但邀東海月莫聽五更鴉

次韻和永叔夜坐鼓琴有感二首

夜坐彈玉琴琴韻與指隨不辭再三彈但恨世少知知
公愛陶潛全身衰弊時有琴不安絃與俗異所為寂然
得真趣乃至無言期

舜琴曰朕有語舜鬱陶乎孝悌怨則否傲恨媿豈無我
嘗撫卷歎歎此孟氏書此書有深意仁義豈久虛公今
乃有感其不在茲歟魚躍與鶴舞物情曾未殊無情則
無應何必問烏魚

李尚書挽詞二首

相門三世貴家法百年同天子賜恩禮史臣書祖風
聲穿苦霧隴穴起寒蓬自古焉能免於茲是始終
伊水西頭月青山北脚雲夜臺無復曉陰嶺有時熏
龍劍雙埋沒庭蘭竟鬱芬不知門下客誰刻道傍文

送朱司封知登州

駕言發夷門東方守牟城城臨滄海上不馱風濤聲
海市有時望閭屋空虛生車馬或隱見人物亦縱橫
變怪其若此安知無蓬瀛昨日聞公說今日聞公行
行將勸

農耕用之卜陰晴

送代州錢防禦

堂堂鴈門行赫赫符節分紫塞千里障紅旗十萬軍世家王爵貴祖廟將臣勲鐘鼓陳牛酒衣裘論典墳呼鷹下青漢牧馬出黃雲竇憲何為者燕然解勒文

寄題廬陵董氏桂林書齋

山東桑柘多江南松桂茂種桑事春蠶栽桂事華構嘗聞雲蓋下聚書為大富往往見子孫綠天掇星宿掇星

星若珠光彩出屋漏秋收萬種田作酒日為壽亦有千里歸錦衣行白晝

次韻永叔乞藥有感

子厚論鍾乳要若鵝翎筒安取啗棗栗謂相出山東所產有所美慎勿憑邨僮公問我餌藥石白將使礪我餌乃藤根得方非倉公曾聞李習之其品今頗同此物俗為賤不入饗品中吾妻希孟光自春供梁鴻荏苒歲月久顏丹聽益聰雖能氣血盛不療貧病攻何如面黧黑

腰金明光宮亦莫如學釣緡鉤懸香藟但知煙水樂寧
計身瘠豐我生無悵意豈異抱篤瘵公乎忽我求略辯
雌與雄雄赤而雌白由來不同功沙合固切似朋好殊
未窮長年苟不遇笑殺渭上翁

和王景彝正月十四日夜有感

燈光煖熱夜催春天半樓開飲近臣馳道橫頭起山岳
露臺周匝簇車輪隔簾豔色多相照下馬輕豪各競新
我已暮年殊趣嚮濃油一棧案邊身

送雷太簡知虢州

牛車讀古書少作游秦客一朝起為郎華省何赫赫若
有南山雲時時生枕席雲潤不益老呼吸乘閒隙抱病
初駭聞既愈賴藥石遂請號太守號事簡且適况有三
堂存韓詩猶可覲永歌復飲酒東平希阮籍

次韻和景彝元夕雨晴

春雲收暮城九陌灑然清星出紫霄下月從滄海明車
音還似畫鼓響已知晴靜閉衡門卧無心學後生

早春書局即事

薔薇結舊蔓天桃種新紅傷根桃不死著架蔓依叢要
以玩芳物亦寧負春風誰念太行下移谷學愚公

古意

林中即鹿人常為虎所即虎豈援鹿者亦各求其食趨
利不顧害禍患安可息古來遯世上輕彼用智力

送李閣使知冀州

騷裊黃金絡春風北渡河將軍守漢法壯士發燕歌綠

水塘蒲短晴天塞鴈多家聲復年少叟鏢笑廉頗

郭園梅花

二月一日

未逢柳條青獨見梅蕊好猶怯春風寒不比江南早清
香拂酒杯素色欺蓬葆佳人金縷衣唱徹嗟身老

送襄陵李令彥輔

李宋丞相妹壻永叔
少居隨州常往其家

公相為近親翰林為故人親舊各賢顯青袍未離身六
十去作令豈慕要路津又思漢東歸便置漉酒巾深希
陶淵明澹然意已真食棗齒易黃晉俗誠自淳尚不顧

隋珠安肯與此鄰送君識君心埽迹向世塵

且歸漢東
便欲致仕

詠劉仲更澤州園中醜石

君家太湖石何從太湖得太湖天東南太行天西北相
去三千里雖有何致力古人煩舟車頑質無羽翼竅引
木蓮根木蓮依以植秋蛇出其中舌吐虹霓色君常夸
於我怪怪亦特特以醜世為惡茲以醜為德事固無醜
好醜好賚不惑

送趙子淵知潁州

舊穀不棲畝新春原鹿飢野荒多寇彼詔發撫疲羸驛
騎東風急舊田小雨遲應同漢太守膏澤亦能隨

寄題楊敏叔虢州吏隱亭

賢哉號略君守號事頗簡有亭後園中登覽早至晚了
松柏關氣象入醉眼花草發瑣細禽鳥啼睨竟日
人不來亦莫去杯琖

次韻王舍人憶省中小桃寄江學士

淺綻燕脂紫蠟芳深斟吳酎白瓊觴鳳池人憶去年豔

雉省客無今日狂髣髴物華先上苑依稀歌吹下昭陽
平明社雨莫催促應翫移牀欲近傍

去歲正聞
禁中賞花

次韻劉原甫社後對雪

社日遇羣飲北風歸馬驕陽烏雲斗晦來燕翅難調朝
霰侵花冷春英到地消宿醒無酒解薄被覺寒饒爐炭
重燃獸衣裘更御貂蟄宮蟲復閉時烏腹將朽點綴何
多思輕狂不奈飄唯知妍可玩寧恤氣為妖刺客偶然
興海神非次朝唱高仍和寡公又作長謠

次韻永叔二月雪

春雲損萌芽未必摧杞菊我心無愛憎隨分樂自足
桃李紅間白豈不悅我目杞菊嫩且甘豈不飽我腹
看花食蔬仍舉杯趁取衰遲鬢猶綠

聞王景彝雪中禡祀還

二月漫漫雪齋宮夜寂寥壇場祠乙鳥桑柘響陰臬履
帶春泥重駒回廣野驕還批五色詔池上踏瓊瑤

來帖云絃

歌之外時復
林臬哀鳴

次韻景彝祀高禩書事

聞說郊禩喜氣翔
曾由乙卯命封商
今朝鐘鼓登歌祀
何日熊羆作夢祥
埽雪野廬風凜凜
陞壇公衮佩鏘鏘
君門賜胙予何有
不似矜誇鳳沼傍

次韻和永叔雨中寄原甫舍人

賴得春巢燕未歸
高檐終日雨衰衰
細籠芳草踏青後
欲打梨花寒食時
美景已嗟空過盡
名園猶許誤相隨
錦鞍切莫九衢去
拍拍一如鵝鴨池

社日曾慎
赴北園

毛君寶秘校將出京示予詩因以荅之

古城踏成谷不見人馬蹤
古人豈不行舊迹豈不重從
何求故步往返自憧憧
觀君百篇詩善畫人形容毫髮
無不似落筆任縱橫
曷如握明鏡物物目所逢
贈以東南歸擲去手中邛

劉仲更於唐書局中種郁李

冷局少風景買花栽作春
前時櫻桃過今日雀李新
榴條紅蓓蕾婀娜含雨勻
舊來薔薇叢饒借與近鄰
始移

棣萼密不慙車下榛日暮綴書罷暫賞舉杯跋

和劉原甫復雨寄永叔

階下青苔欲染衣晴光纔漏又霏微衝風燕子銜泥去
隔樹鶉鴝嗔婦歸乍冷乍陰將禁火自開自掩不關扉
渾身酸削嬾能出莫怪與公往還稀

送正仲都官知睦州

每嗟相逢少常苦離別多行行復壯壯往往起悲歌古
來易水上義士有荆軻捐軀思報恩飲恨歌奈何況彼

兒女懷牽纏如蔓蘿是以世間人鬢髮易番番喜君得
郡章東歸隨春波灘上嚴子祠繫船聊經過其人當漢
興富貴不可羅足加天子腹傲去釣于河冬披破羊裘
夏披破草蓑心中小宇宙尤哂獻玉和我慙賤丈夫豈
異帶面儼未免為鬼笑誰知懼揮訶安知如君行收迹
已蹉跎空將閑歲月塵埃浪銷磨正同三峽賈盡力向
盤渦

續永叔歸田樂秋冬二首

秋風忽來鳴蟋蟀
豆葉半黃陂水枯
織婦夜作露欲冷
社酒已熟人相呼
坎坎擊鼓坐林下
醉去自有兒童扶
壯男獨獵南山虎
中子已拔荒徑狐
田家此樂樂有餘
食肉緝皮裘豈無
我雖愛之乏寸土
待買短艇歸江湖
北風如刀割寒骨
穀已成困不倉猝
任從密雪落交加
旋採乾薪燒櫓杵
鉏犁滿屋牛在牢
鵝鴨亂鳴雞亂發
割烹炊黍待鄰叟
飽向茅檐閑兀兀
田家此樂樂無涯
誰能一生空汨沒
公希平子定何如
我效梁鴻終適越

和介甫明妃曲

明妃命薄漢計拙憑仗丹青死誤人一別漢宮空掩淚
便隨邊馬向邊塵馬上山川難記憶明明夜月如相識
月下琵琶旋製聲手彈心苦誰知得辭家只欲奉君王
豈意蛾眉入虎狼男兒反覆尚不保女子輕微何可望
青冢猶存塞路遠長安不見舊陵荒

酬楊愈太丞之壽州見別

疇昔西州謝法曹聲名籍甚我徒勞升沉一府已荒冢

憔悴兩人猶二毛
眼見榮華能幾日
心知富貴只秋毫
淮南魚美香杭滑
飽去清吟豈不高

贈太子太傅王尚書挽詞二首

周原開隴隧
鹵簿葬名臣
北極履聲絕
東朝車迹湮
藏舟移夜壑
棲鵬去承塵
共看劉寬墓
碑陰幾許人

平生性忠厚
所守必尊君
面實賢愚混
心惟白黑分
事光中執法
書集右將軍
天意苦埋沒
北邙松柏墳

送陝西都運彭待制

塞下兵難去關中粟未多君心同漢帝糧道得蕭何函
谷馬蹄入渭橋車轍過地形終險固山色舊嵯峨
先賢傳重聽得寶歌歸來奏天子安穩看鳴珂

送羅職方知秀州

陸雲嘗誇千里莼便輕羊酪同埃塵君今得郡正千里
已患無羊馱此珍乃知南北各所樂乘舟不如乘馬惡
水邊不見秦羅敷縱有西施肌肉薄使君事事未稱意
綠水芙蓉定何若

寄懷劉使君

敬

昔我從仲父三年在河內
春游丹水上花竹弄粉黛
人誇走馬來盡眼看沒背
薄暮半醉歸插花紅簇隊
使君今少年時往勸耕耒
安行過樹下野杏正破纈
何不學山公酩酊還倒載
令人知使君心膽不瑣碎
切莫懲婦翁慷慨臨并代
一朝由謫謫雖去民苦愛
實計幸不幸豈較進與退
因書寄此懷繩墨老且悔

贈僕射侍中劉相公挽詞三首

處外諸侯重居朝聖主知祆逢庚子日夢異武丁時歸
樽關山遠凝笳道路悲欲傳千古迹佐世本無為

古今皆可見富貴不常存歌者未離席弔賓俄在門朱
輪空返轍綠酒尚盈樽人事固如此令名貽後昆

歎此微末迹見公三十年貴為天子相能擇大夫賢東
第門闌在南州隴隧延立碑思叔子隋淚峴山前

送胥平叔太博通判湖州

依依隄邊柳泛泛水中舟舟行無遠近柳影不隨流東

風欲粉絮相逐江上頭正見魴魚來貫條尾脩脩使斫
橫刀膾便銷千里愁檣端燕暫語即飛入高樓樓中饒
客飲共候風色柔明朝同挂帆直過南徐州吳地多平
湖纜柁明鏡秋芙蓉拂兩舷女艇花底謳不羨乘五馬
却逢羅敷羞此官當此時莫憶塵中游


寄題張令陽翟希隱堂

每讀陶潛詩令人忘世慮潛本太尉孫心遠迹亦去不
希五斗粟自種五株樹曠然箕山情復起濠上趣今時

有若此我豈不懷慕

李士元學士守臨邛日有穀一莖九穗者數本
芝數本蓮花連葉並蒂者各一本因賦之

臨邛傳瑞物太守在郡時既多九穗穀復有三秀芝芝
以保萬壽穀以豐東菑更看芙蓉葉並蒂照清池



宛陵集卷二十三

欽定四庫全書

集部

宛陵集卷二十四

詳校官庶吉士臣張溥

檢討臣何思鈞覆勘

覆校官博士臣劉光第

校對官主簿臣汪日贊

謄錄監生臣林李

欽定四庫全書

宛陵集卷二十四

宋 梅堯臣 撰

郭之美忽過云往河朔謁歐陽永叔沈子山

春風無行迹似與草木期
高低新萌芽閉戶我未知
忽聞人扣門手把蟠桃枝
問我此蟠桃緣何結子遲
但笑不復荅問者當自推
振衣向河朔河朔人偉奇
以茲荅意遲子北歸時

讀蟠桃詩寄子美永叔

韓孟於文詞兩雄力相當偶以怪自戲作詩驚有唐篇
章綴談笑雷電擊幽荒衆鳥誰敢和鳴鳳呼其皇孟窮
苦纍纍韓富浩穰穰窮者啄其精富者爛文章發生一
為宮擘斂一為商二律雖不同合奏乃鏘鏘天之產奇
怪希世不可常寂寥二百年至寶埋無光郊死不為鳥
聖俞發其藏患世愈不出孤吟夜號霜霜寒入毛骨清
響哀愈長玉山禾難熟終歲苦飢腸我不能飽之更欲
不自量引吭和其音力盡猶勉彊嗟我於韓徒足未及

其牆而子得孟骨英靈空北邙誠知非所敵但欲繼前
芳近者蟠桃詩有傳來北方發我衰病思藹如得春陽
欣然便欲和洗硯坐中堂筆墨不能下怳怳若有亡老
雞甯爪硬未易犯其場不戰輒自却雖奔未甘降更欲
呼子美子美隔濤江其人雖憔悴其志獨昂昂氣力誠
尚對勝敗可交相安得二子接揮鋒兩交銑我亦願助
勇鼓旗譟其傍快哉夫子樂一醵宜百觴乖離難會合
此志何由償

孫司諫知鄧州

甫

南陽漢名都其俗尚敦樸亡徒頃為盜刺史安與角田
野遂焦熬蒿萊思沃濯茲雖得甘露向已苦風電更張
固所重下令未宜數且觀道傍碑文字今已剥

史尉還烏程

宏

與君去年別君來竟悲喜乘馬夜訪君備陳昔行李五
月辭吳中六月渡揚子七月行喪妻是月子又死買棺
無橐金助貸賴知已嬌兒晝夜啼幼女飲食止行路况

炎蒸悲哀滿心耳青銅不忍照憔悴鄰於鬼八月至都
下少長疾未已一婢復嗑然老媪幾不起君門日預朝
僕乘貧可恥十月補王畿受代隔歲紀閉門陋巷中悶
默閱書史初聞君至之如見湖山美今聞君復還為我
謝雲水故交儻相問懷抱今如此豈乏南飛鴈豈無東
下鯉自同嵇康嬾作書愁把紙

薛九宅觀鵬孤圖

蜀中處士李懷袞手畫皂鵬擒赤狐猛爪入頰背迸血

短尾獨俛窮蹄鋪鵬爭怒力狐爭死二物形意無纖殊
一禽一獸固已別硬羽軟毛非筆模入君此室見此圖
如在原野從馳驅

寄汶上

大第未嘗身一至人猜巧宦我應非彈冠不讀先賢傳
說劍休更短後衣瘦馬青袍三十載故人朱轂幾多違
功名富貴無能取亂石清泉自憶歸

蕭著作宰豐城

王都二月花正開
社雨作陰迎燕子
人先春色向江南
江南春色歸春水
拍岸綠波生荻芽
晨羞聊可助甘旨
縣涂為政子所諳
不敢贈言言且鄙

董安員外之信州鉛山簿

古岸綠蒲老春帆
逆水輕烹鮮聊以
芼泝險復兼程可
用茲時樂無將遠
道驚曾為江上客
因贈北行人

弟得臣殿丞僉判越州

前為山陰宰

再為會稽行聊問
會稽美禹穴遷所
探秦望斯所紀年

深已浸深書碑必亡矣剡溪有樵風其事恐非是買臣
千載後得無負薪子黃庭昔換鵝道士儻不死行當訪
其真願以鵝報爾慎勿笑我癡萬事難可擬摘筍復盈
檐緡魚新出水此又食之珍因書悉條理

李舍人淮南提刑

啄木欲除蠹蠹去樹亦撓何須食微蟲爾腹豈不飽天
下本無事自為庸人攬君實知古深終慙用傾巧

吳殿丞代州通判

舉才不避世必也知其長王官誠濟濟豈得佐邊疆代
郡實雄要昔已選帥良功名乃欲取叱馭登太行

和人喜雨

仲冬至仲春陰隔久不雨耕農將失時萌穎未出土帝
心實焦勞日夜不安處禱祠煩駮奔盼饗香無補帝時
降金輿徧款靈真宇百姓知帝勤變愁為鼓舞和氣能
致祥是日雲蔽午夕風不鳴條甘潤忽周普已見堯為
君安問誰為輔

胥員外之復州景陵尉

城隅漢水闊正足槎頭鱖采荇蕪登俎施罟不貴錢江
帆風勢美竹屋雨聲連必有蒼苔碣留為好事傳

李審言歸鄭州

嘗從京索間躍馬望春山氣象歸王國邱陵接漢關長
榆啼鳥亂細草牧陂閑老馱行涂路因歌送子還

李舍人見過

春泥無處所窮巷少人行忽枉青絲騎曾非白面生笑

言聊與適雞黍未嘗烹莫歎余貧甚吾儕業本清

春鵲謠

春巢纍纍衆鳥哺兒衆鳥不出巢羣雛嗷嗷腹甚飢不出巢其謂何上有蒼鵲窺其巢問鵲何仇鵲不我顧我巢有雛開口待哺一日不擊巢雛不食爾憂爾雛衆鳥號呼又可吁

來夢

忽來夢我于水之左不語而坐忽來夢余于山之隅不

語而居水果水乎不見其逝山果山乎不見其塗爾果爾乎不見其徂覺而無物泣涕連如是歟非歟

汴之水二章送淮南提刑李舍人

汴之水分于河黃流濁濁激春波昨日初觀水東下千人走喜兮萬人歌歌謂何大船來兮小船過百貨將集玉都那君則揚舲兮以紂刑科汴之水入于泗黃流清淮為一致上牽下櫓日夜來千人同濟兮萬人利利何謂國之漕商之貨實所寄我送行舟于水之次春風吹

雨旌君作天王使，畧客自求魚。清江莫相避。

宋次道一百五日往鄭拜墓

去不避春雨，泣望松柏門。颯然風悲響，如感泉下魂。沃
醑向墳土，空濕陳草根。人歸夜月冷，石馬在九原。

孫太祝亳州僉判

微風起船尾，雨氣生日脚。不愁春路泥，正泛春波樂。順
去疾鳥飛，問程殊我度。才名留守家，更入尚書幕。

寄靈隱通教僧

寄山若洗青草木生石上根萌不可窮條蔓自增王其
陰有高僧日食惟一盞世人久已疎猿鳥應相向

李少傅鄭圃佚老亭

莊生述天理老固當念佚舉世用自勞誰能以為必我
公謝鼎司嗣子都華秩代言輟帝右作藩輔王室承顏
向茲地園宇樂永日佳樹發已鰥脩竹移未密春禽時
弄吭清景付吟筆朱金待金構榮美安與匹

令狐祕丞守彭州

挺

前時草草別渺漫二十年從宦各所適非為道路偏今
始一相遇言媿少壯前子有萬里翺尚不飛雲煙而復
走隴蜀欲以條教宣將西過危棧葉暗聞杜鵑未知為
郡樂預已抱愁煎再來與子辭當去復留連且念前期
遠歲月實易遷

依韻和李舍人旅中寒食感事

一百五日風雨急斜飄細濕春郊衣梨花半殘意思少
客子漸老尋游非戢戢車徒九門盛寥寥煙火萬家微

今朝甘自居窮巷無限堦間得醉歸

依韻和張應之見贈

京洛多游好相與歲月深雖同執一籥吹曲各異音自
微衆音響安感萬物心我窮子來唁慷慨發長吟

哭尹子漸

其弟師
魯守潞

故人河內守昨日報已亡同氣泣上黨悲風生太行曩
為衆所惜今復人共傷阮籍本真牽感驟壽不長

次道約食後同敏叔中道平叔如晦詣景德浴

以風埃遂止

昔思春服成浴子沂水上仲尼亦所志語此雖未向子
今當是時有意同我尚已邀二三友欲往期畢餉倏然
風滿塗塵土阻清曠安得一振衣徒希舞雩唱

陳經祕校之信州幕

東吳海物錯南楚江味多家吳而宦彼風土去幾何既
得風土樂可贊政治和歸來識香草為綴楚人歌

朱武太博通常州兼寄胡武平

昔我陽夏公嘗茲同郡治政餘作東園草木尚有意豈
不務安養斯民歌樂易是時有賢才鄉舉堪皇器今方
居冢廬試質當時事願君思前人文雅庶未墜

師厚云蟲古未有詩邀予賦之

貧衣弊易垢易垢少蟲難羣處棠帶中旅升裘領端藏
迹詎可索食血以自安人世猶俯仰爾生何足觀

依韻和中道寶相花

嘉卉得所託植君之寢陽開榮同此春澹豔自生光不

為露益色不為風盡香節換葉已密尚可見餘芳

擬陶體三首手問足

共生一體中出處常相并所動輒有迹何不擇地行履
舄雖可蔽步武豈無聲嘗思汝為玉請刖見直誠

足荅手

上下各有分同質實異支要用固爾先當念扶我危我
刖爾獨安何以幸華夷且願縮袖間操執自有時

目釋

我居元首間分竝
日月光左右各照曜
盲一豈相妨尚
恐有所醫獨見不能彊
嗟爾手與足何為欲競傷
捉馳自有職勿使心悲涼

贈葉山人

傾珍奉賓客傲物云珥貂
貴來不以屈飲酒且逍遙
黃金百鎰盡左右無纖腰
但存丹砂術有道在一瓢

李廷臣通判蔡州

夾路青青草隨君去未休
亦將離思遠還共翠心抽
細

藉車輪穩薰牽野蔓柔王孫歸不久冉冉莫經秋

朱櫻

明珠摘木末紅露貯金盤始見侍臣賜已為黃雀殘味
蕪羊酪美食馱楚梅酸苑囿東周盛纍纍映葉丹

悼子

十名

舟行次符離我子死阿十臨之但驚迷至傷反無泣款
定始懷念內若湯火集前時喪爾母追恨尚無及邇來
朝哭妻淚落襟袖濕又復夜哭子痛并肝腸入吾將仰

問天此理豈所執我惟兩男子奪一何太急春鳥獨蔓
延哺巢首戢戢

懷悲

自爾歸我家未嘗厭貧窶夜縫每至子朝飯輒過午十
日九食齋一日儻有脯東西十八年相與同甘苦本期
百歲恩豈料一夕去尚念臨終時拊我不能語此身今
雖存竟當共為土

和中道雨樹

一旬苟不雨萬木昏蒼蒼朝見洗林葉動搖生輝光晚
逢開疎陰枝上漏微陽翠色固已好安得無秋霜

永叔寄詩八首并祭子漸文一首因采八詩之
意警以為荅

昔聞退之與東野相與結交賤微時孟不改貧韓漸貴
二人情契都不移韓無驕矜孟無醜直以道義為已知
我今與子亦似此子亦不媿前人為北都健兒昨日至
扣門乃得所遺詩上言病中初有寄下言我詠蟠桃枝

盛衰開落感殘杏暮春無事羨游絲班班鳩鳴忽懷念
一掃十幅無閑辭洛川花圖多品目鬪新爭巧始可疑
讀書又憶石夫子似蠶作繭誠有之鎮陽歸夢北潭北
吟此八章誰謂癡最後有文弔尹子壽夭難問信所悲
共書大軸許傳玩一日百展曾忘疲報君亦欲齎滿軸
恐費紙墨令人嗤

黃敏復尉新城

新城接桐廬山茗久所利江東亡命兒販不畏黥劓堂

上千金子捕以操凶器恐非吾徒為勇少乃可避

寄永叔

夏日永以靜渴鳥方在枝張口不能言翕翕兩翅披庭
中有井泉井深無綆縻欲汲假其隣隣且非我知鴻鷗
矯河上比爾得所宜得宜豈不樂胡然我念之

丞相二章

丞相之拜冠弁旅至乘馬載驅如彼鉅渚有鴈有鷺有
龜有魚烝然來萃翔泳嘯呼

丞相之去乃還印綬乃飭車輪如彼涸津時靡翔羽時
靡游鱗寂兮寂兮豈有嘉賓

閔讒狡二章

矯有讒狡讒以戕類狡以媚其貴謂不騫不墜謂人莫
爾制而死制之誰謂無鬼孰制之死

彼狡之將死若有以見既見既惡之引被蒙面謂人莫
爾辨而自辨之誰謂無鬼孰俾之譴

薛八殿丞有遺

未嘗營貨貝貨貝寧為來俸苦月不足貧死口肯開好事忽我恤十千助晨杯薪水已過豐不得如顏回

師厚與胥氏歸來奠其姑

雙裾來此室慟哭拜靈牀魂衣想髣髴薄酒湛其觴含悽拊孤穉拭淚問平常我生都無如仰看燕在梁

諭烏

百鳥共戴鳳惟欲鳳德昌願鳳得其輔咨爾孰可當百鳥告爾間惟烏最靈長乃呼烏與鵲將政庶鳥康烏時

來佐鳳署置且非良咸用所附已欲同助翱翔以燕代
鴻鴈傳書識暄涼鸛鵒代鸚鵡剥舌說語詳禿鶻代老
鶴乘軒事昂藏野鶻代雄雞爪背稱擅場雀豹代鸚鵡
搏擊肅秋霜蝙蝠嘗入幕捕蚊夜何忙老鷗啄臭腐盤
飛使游揚鵲與梟鵬待以為非常一朝百鳥馱讒烏
出遠方烏伎亦止此不敢戀鳳傍養子頗似父又貪噪
豺狼為鳥鳥不伏獸肯為爾戕莫如且斂翮休用苦不
量吉凶豈自了人事亦交相

弔裴易進士

力學未及仕口中已含珠賦命固所負讀書非所辜
斂送有兄弟哭泣無妻孥惟此靡薄厚必竟同一塗

閑詠寄呈次道

我閑日貧縛子閑數疾纏閑固不可常吾觀與子然
吾與子嗜學豈獨閑窮年安安者誰歟分亦似所偏

寄楚州呂濟叔

亭午鳥不下誰復過我廬忽聞扣門者偶出問何如云

是山陽吏太守遣置書自惟久窮困游子安念于淮陰
況要津賓館無暫處豈意有所逮委曲情未疎報言媿
不覩聊以謝興居

荅中道小疾見寄

嵇康性彌嬾曾不廢養生子姑當妙年何乃勞其精老
聃有至論身孰親於名詩本道情性不須大厥聲方聞
理平澹昏曉在淵明寢欲來於夢食欲來於羹淵明儻
有靈為子氣不平其人實傲佚不喜子纏縈吾今敢告

子幸願少適情時能與子飲莫惜倒餅罌

五月五日

屈氏已沉死楚人哀不容何嘗奈讒謗徒欲却蛟龍未
泯生前恨而追沒後蹤沅湘碧潭水應自照千峰

送可教僧歸越

萬事猷尋常羨慕每不足居南多北思在遠慙近俗既
來橘變枳但見空條綠氣味誰復論孤根逗巖曲

和裴如晦雨中過其亡兄易居

人亡雨館寂車馬偶來臨濕衣添新淚故物傷夙心淒淒亭下樹萬葉起哀音此地嘗對語在昔豈知今

雨中宿謝胥裴三君書堂

急雨射窗鳴燈殘我正寢穴蚓聲苦長流響入孤枕衆醉如不聞彊聒亦已甚夜短竟無寢困瞳劇塵礮

和中道雨中見寄

雨淫止復落雲暗不少開泥將沒馬脰思子日幾迴我既不可往子亦不可來屋漏又苦甚巾烏生莓苔安肯

問農畝唯憂無酒材但能置醇酎莫負吾尊罍

宛陵集卷二十四

欽定四庫全書

宛陵集卷二十五

宋 梅堯臣 撰

送謝寺丞新賜及第赴扶溝宰

世所重登科如君特才選麗賦驚宗工妙譽動京輦行
鷗路非遐雙旗風欲展聊閱民版餘應不負墳典

和李廷老三月十四日

三月日幾望士游溱水陽溱流已渙渙有美此翱翔偶
來適此願月色同滿牀士曰陟少室女曰歸大梁及晨

各異役悲喜竟回腸
芍藥有遺風贈好期
不忘固匪子能逮是
焉繼新章

苦熱

赤日若射火林風不動梢
羸汗尚流沛冠服豈堪包
貴人諒有稟慣習非彊教
竊觀行車馬全蕩劇煨炮
寧思山中人石泉浸兩髀

劉薛二君過予遇雨

猛雨迫好鳥止我屋
室隅是時有劉薛亦既
此焉俱我

廢秣爾馬我厨飯爾奴二人乃可語因觀爾馬圖古筆
得神妙俗工非所模收圖雨且止鳥飛當駕驅

答廷評宗說遺冰

仲夏遘餘閏屋室如炊蒸孰云窮處者言贈太官冰時
靡有暍死實亦賴友朋定能涼一席既已却青蠅吾心
久自信飲已不以矜

劉牧殿丞通判建州

平生交遊少海內寡與期識君且恨晚一見已將離人

言何嗟別曾此非舊知荅曰匪我舊亦既接音詞譬彼
空林鳥止息偶同枝忽有振翮去尚爾鳴聲悲我今臨
流送安顧俗所為

和中道伏日次韻

伏日每苦熱古來亡事侵嘗聞東方朔割肉趨庭陰百
職當早罷將畏赫日臨我無歸遣人懷念空霑襟

和蔡仲謀苦熱

大熱曝萬物萬物不可逃燥者欲出火液者欲流膏飛

鳥獸其羽走獸獸其毛人亦畏絺綌况乃服冠袍廣厦
雖云託呼風不動毫未知林泉間何以異我曹蠅蚊更
晝夜膚體困爬搔四序苟迭代會有秋氣高

儼上人粹隱堂

十年不出戶世事皆剗鉏時無車馬遊焚香坐讀書有
堂曰粹隱惟見安且舒心遠迹非遠歲月速輪輿寓目
暫為實過者即為虛譬若開是室終日於此居欲問昨
日事已覺今日疎明朝却視今復與前何如聊悟此中

樂猶觀濠上魚

送鄭太保瀛州都監

秋氣入關河匈奴久已和
琰弓聊可試寶劍不須磨
草木將搖落牛羊自寢訛
能知塞垣景持以贈吾歌

送刁安豐

嘗遊芍陂上頗見楚人為
水有烏魚美土多薑芋宜
寧無董生孝將奉叔教祠
舊令乃吾友寄聲於此時

劉八飲將散分得非休沐
不得會

閏五月
晦日

君非休沐時茲會豈能得我無官局縈幸爾預歡適莫
辭衝雨歸歸時烏帽側

贈張處士

聞爾閑於琴寢處未嘗輟抱之京城來豈與工師列一
奏流水聲落指鳴決決既曰林壑人安事塵土轍

將行與蔡仲謀飲分席上果得桃

曾無千歲人安見千歲實聊效昔所投瓊瑤報非一

荅裴送序意

我欲之許子有贈謂我為學勿所偏誠知子心苦愛我
欲我文字無不全居常見我足吟咏乃以述作為不然
始曰子知今則否固亦未能無諭焉我於詩言豈徒爾
因事激風成小篇辭雖淺陋頗尅苦未到二雅未忍捐
安取唐季二三子區區物象磨窮年苦苦著書豈無意
貧希祿廩塵俗牽書辭辨說多碌碌吾敢虛語同後先
唯當稍稍緝銘誌願以直法書諸賢恐子未諭我此意
把筆慨歎臨長川

和張士曹應之晚景

遠空雲解駁南陌雨初收
獨鳥去煙外斜陽明樹頭
涼飈虛枕席漲潦起汀洲
會有從軍役將離更暮愁

送楊浩祕丞入蜀

有才不得試志亦無所干
有母不得養法當之遠官
雖曰在民政孝心寧得安
志願且未遂而趨蜀道難行思
叱馭者勿復苦長歎

乙酉六月二十一日子應辟許昌京師内外之

親則有刁氏昆弟蔡氏子予之二季友人則胥
平叔宋中道裴如晦各攜肴酒送我于王氏之
園盡歡而去明日予作詩以寄焉

性僻交遊寡所從天下才今朝誰出祖親戚持尊壘晚
節相知人唯有胥宋裴所欠謝夫子歸穰尚未迴岸傍
逢名園繫舟共徘徊嘉蓮如笑迎照水呈丹顙南庭蒲
萄架萬乳纍將礪羣卉競瑣細紫紅相低俚尋常固避
近孰辨落與開酒闌各分散白日將西頽城隅遂有隔

北首望吹臺

開封古城阻淺聞永叔喪女

去年我喪子與妻君聞我悲嘗俛耆今年我聞君喪女
野岸孤坐還增思思君平昔憐此女戲弄膝下無不宜
昨來稍長應惠黠想能學母粉黛施幾多恩愛付涕淚
灑作秋雨隨風吹風吹北來霑我袂哀樂相恤惟已知
自古壽夭不可詰天高杳杳誰主之以道為任自可遣
目前況有寧馨兒

寄謝開封宰薛贊善

予生多不偶事事相與背適從平川役乃遇河決潰舟
膠在中野寸步使心癉誰知赤縣尹勤恤每外內文符
飭亭長寇盜虞鼠輩仍能饋餅餌童穉仰所賚今又置
酒壺惠問亦已再令我清夜飲是夕值月晦獨酌效謫
仙而復無影對如何忘情游似亦有世態家人誠可同
况我昨喪配雖曰預朝裾左右無粉黛兀然唯書史舊
學猷瑣碎欲探文字工下筆語多礙却思君西齋新治

虛可愛燕坐禽鳥寂吟哦簿書退此樂吾未如區區勞
覆載

草木

草木無處所動搖知風形今日萬葉黃昨日萬葉青青
既漸衰變黃亦漸彫零人生恃歲月種柏滿郊坰

夢登河漢

六月二十九日

夜夢上河漢星辰布其傍位次稍能辨羅列爭光芒自
箕歷牛女與斗直相當既悟到上天百事應可詳其中

有神官張目如電光玄衣乘蒼虬身佩水玉璫邱蛇與
穹盤盤結為紀綱我心恐且怪再拜忽禍殃臣實居下
土不意涉此方既得接威靈敢問固不量有牛豈不力
何憚使服箱有女豈不工何憚縫衣裳有斗豈不柄何
憚挹酒漿卷舌不得言安用施穹蒼何彼東方箕有惡
務歟揚唯識此五者願言無我忘神官呼我前告我無
不臧上天非汝知何苦詰其常豈惜盡告汝於汝恐不
祥至如人問疑汝敢問於王叩頭謝神官臣言大為狂

駭汗忽爾覺殘燈熒空堂

寄宋次道中道

再來魏闕下舊友無一人或為美官去或為泉下塵晚
歲相知者操節許松筠日世常山公伯仲文學均與我
數還往以義為比隣屢假篋中書校證多護真次述盈
百卷補亡如繼秦中作淵明詩平澹可擬倫于時多驕
佚黃卷罕所親昨以興西師往往劒射伸短衣誇走馬
睥目語常瞋欲效西山勇遂笑東魯仁捨本趨富貴乃

與市賈濱以此較於子素業固未泯前日之許昌別君
已經旬偶然值河決窮坐如涸鱗臨風思有寄夜詠還
達晨

日蝕

赫赫初出咸池中浴光洗迹生天東不覺有物來晦昧
團團一片如頑銅前時蝦蟇食爾妃天下戢戢無有忠
責罵四方誰膽大仰頭憤憤唯盧仝欲持寸刃去其害
氣力雖有天難通是時了無毫芒益徒有文字辨且雄

全死于今百餘載日月幾度遭遮蒙有人見之如不見
誰肯開口咨天公老鴉居處已自穩三足鼎峙何乖慵
而今有嘴不能噪而今有爪不能攻任看怪物瞋天眼
方且省事保爾躬日月與物固無惡應由此鳥招禍凶
吾意髣髴料此鳥定亦閃閃避離日宮安逮后羿不乖暴
直與審憊彎強弓射此賈怨鳥以謝毒惡蟲二曜各安
次災害無由逢南不由赤鳥東不誚蒼龍北龜勿吐氣
西虎勿嘯風五行不汨陳虞舜生重瞳我今作此詩可

與全比功

寄王江州

休嗟謫官去山根勝窮邊當職言無隱他時事好還何
嘗聞堠火唯是對爐煙潮到益城否猶期信可傳

薛九公期請賦山水字詩

薛君堂懸山水字請我賦作山水詩呼童磨墨慰君意
彊作安得有好辭昔年曾是杜陵客東城水上橫此碑
字方數尺形勢健豈似取次筆畫為東城父老語於我

推本初自開元時不知當時何所用費力刻刻為瓌奇
我去長安十載後此石誰輦來京師苑中構殿激流水
暮春脩禊浮酒卮是時詞臣出不意酒半使賦或氣萎
日斜鳴蹕不可駐未就引去如鞭笞脫我幸得預此列
玉階立隅從然冀今雖下筆不稱意已書滿幅令君嗤
七夕有感

去年此夕肝腸絕歲月淒涼百事非一逝九泉無處問
又看牛女渡河歸

過開封古城

荒城臨殘日雞犬三四家
豈復古阡陌但聞新桑麻
頽垣下多穴所窟狐與蛇
漢兵墮銅鏃青血為土花

通判桃花廳

自此詩許州起慶歷五年秋盡六年夏

種桃西庭下有意延東風
東風與雨至染出枝上紅
花底有小鳥其字曰桃蟲
既於桃得名為桃言女工
剪羅作舞衣奉君歡莫窮
舉杯無媿者避世武陵翁

任廷平歸京并序

廷平任君往者登進士科入許幕後二年予被太原公
辟與君為代君之嚴君以太子少保致仕西都西都去
許其道有三北趨鄭過函谷而至洛陽其塗而遠西趨
汝由闕塞而河南其塗小艱然邇於北道西北趨登封
歷轆而至洛師其塗險惡不與二道比君之歸也捨二
道之平易踐西北之險惡何哉是非急於拜慶邪豈特
與人情異歟噫人以為險在君為易由出於天誠不為
難也出天誠易險道可謂孝也乎及其行予故作詩以

送之

言之少室西定陟輾轅險歸心不避危夕枕屢成魘秋聲故苑空野氣荒陵掩獨念京洛塵曾將客衣染

和通判太博雞冠花十韻

神農記百卉五色異甘酸乃有秋花實全如雞幘丹籠煙何聳聳泣露更團團取譬可無意得名殊足觀逼真

歸造化任巧即雕刻赤玉書留魏丹砂句誦韓

魏文帝與鍾繇

求玉珎書論玉云赤如雞冠韓誠能因物比誰謂一時文公闕雞聯句云頭垂碎丹砂

難有客驅辭穎臨風運筆端嘗嗟古吟缺每惜此芳殘
揣情苦精妙繼音慙未安

秋夜感懷

風葉相追逐庭響如人行獨宿不成寐起坐心屏營哀
哉齊體人魂氣今何征曾不苦隕籜繞樹猶有聲涕淚
不能止月落雞號鳴

依韻和通判八月十五夜招玩月二章

尋常圓魄豈不好競愛今宵分外明明極只知無隔礙

誰言桂樹向中生

一年一見最堪惜
百歲百夕能幾多
縱有明年似今夕
明年同會復如何

蚯蚓

蚯蚓在泥穴
出縮常似盈
龍蟠亦以蟠
龍鳴亦以鳴
自謂與龍比
恨不頭角生
螻蛄似相助
草根無停聲
聒亂我不寐
每夕但欲明
天地且容畜
憎惡唯人情

秋風

秋風不饒物斗至聲已惡青林葉尚綠雖好將恐落人
意誠愛惜節候肯相若白髮無再玄盛衰茲可度

韓宗彥寺丞通判鄧州

往歲陪祠泰壇下始一相見如相知我今入幕君有待
喜得款語勝前時便嗟陳事日侵汨雖欲數面曾無期
忽聞兵吏已迎候馬有行色車將脂賀君有意事清簡
太守亦鄙尋常為騏驥步驟宣局促鳳皇羽翼多威儀
漢家近親不復有召父舊聞於今墮墮由狂者生利害

曾未略究民間宜祇言引水幸圭賦矯請罷毀功何施
千載厚惠一日去至今農畝空嗟咨夫子才高識且遠
勿畏勢力重扶持他年人作去思頌願以大字書長碑

韓欽聖問西洛牡丹之感

韓君問我洛陽花爭新較舊無窮已今年誇好方絕倫
明年更好還相比君疑造化特著意果乃區區可羞恥
嘗聞都邑有勝意既不鍾人必鍾此由是其中立品名
紅紫葉鰓矜色美萌芽始見長蒿萊氣歛旋看壓桃李

乃知得地偶增異遂出羣葩號奇偉亦如廣陵多芍藥
閭井荒殘無可齒淮山邃秀付草樹不產髦英產佳卉
人於天地亦一物固與萬類同生死天意無私任自然
損益推遷寧有彼彼盛此衰皆一時豈關覆燾為偏委
呼兒持紙書此說為我緘之報韓子

夢感

生哀百十載死苦千萬春何為千萬春厚地不復晨我
非忘情者夢故不夢新宛若昔之日言語尋常親及寤

動悲腸痛逆如刮鱗

秋鴈

秋鴈多夜飛前羣後孤來儔合鳴自得隻去音已哀哀
音能感人腸酸非食梅共將形影對安得不早哀

依韻和通判把菊有寄

湖邊草樹多蠹葉已少色唯菊不畏霜澹豔如有德自
與蘭並生非因人所植愛貴曾未馱秋日短苦逼朋好
各相望採持空歎息臨杯不能飲對案不能食借問君

何憂節物感人極

曹承制知永康軍

脩

鐵驄黃金羈年少蜀城守蜀城臨古江正在離岸口離
岸李涼鑿其利實不久既避沫水害又以溉田畝大此
百民宜遺祠奉牲酒行當謹厥事無乃為政首

三鳥

翩翩三奇鳥各擇松桂宜二鳥同所向並立高高枝一
鳥依別樹屈比二鳥卑嗟嗟天下鳥莫與三鳥期三鳥

鳴少和蒿間多鶯斯頻頻徒爾黨三鳥安可欺

龍箕一首

并序

在昔賢人良輔之生也或山之神靈和氣之隣或星之
魄曜晶明之所鍾故詩有蒿高之作稱厥甫申傳說騎
箕之說又得之前古公之誕日考之星歷月次于箕宜
與說同也夫登翊王室為宗鉅臣豈徒然歟依雅頌作
龍箕一章十八句以獻

龍箕在天莫不孕靈我公生之既生既德曾誰與京爰

弼帝右繼序其榮之贊我太平萬事其成之殿我輔邦
庶民其寧之政靡薄厚百職其揚之宜言顯光永錫乎
后王迺祝眉壽迺獻兕觥福祿其將之



宛陵集卷二十五